

Headline	Haji Taib peniaga terawal pasar tani tertua di Kuala Pilah		
MediaTitle	Sinar Harian (Selatan)		
Date	03 Jun 2018	Color	Full Color
Section	News	Circulation	160,000
Page No	26	Readership	509,000
Language	Malay	ArticleSize	202 cm <sup>2</sup>
Journalist	N/A	AdValue	RM 1,415
Frequency	Daily	PR Value	RM 4,245



## Haji Taib peniaga terawal pasar tani tertua di Kuala Pilah

KUALA PILAH - "Saya telah berniaga di Pasar Tani Kuala Pilah hampir 30 tahun dan antara peniaga paling lama di sini," kata Mohd Taib Mohd Sudin, 80.

Mohd Taib antara 70 peniaga di pasar tani tertua di Kuala Pilah setelah bertapak sejak 32 tahun apabila mula dibuka pada 25 Mac 1986 dan beroperasi setiap Sabtu jam 7 pagi hingga 12 tengahari.

Lebih mesra dipanggil Haji Taib, dia kini hanya membantu anak ketiga, Nazri, 39, menjual ikan keli, talapia dan daging salai.

"Memandangkan usia pakcik pun dah masuk 80 tahun, pakcik serahkan perniagaan ini kepada anak pakcik untuk dia teruskan legasi berniaga di sini.

"Syukur perniagaan tetap lancar meskipun pakcik tidak menjadi jurujual, tetapi kalau tergerak hati hendak bantu anak, pakcik datang ke sini untuk bertemu pelanggan tetap," katanya ditemui di pekan Kuala Pilah.

Haji Taib juga tidak terlepas mengalami kerugian



Haji Taib (kiri) berniaga di Pasar Tani Kuala Pilah hampir 30 tahun dan antara peniaga terawal di pasar tani tertua dalam Kuala Pilah.

pada awal menceburi bidang perniagaan di sini.

"Dulu pakcik jual petai, ikan basah, tetapi tidak jalan dan tiada untung. Kemudian pakcik beralih kepada produk salai dan ia menjadi.

"Pakcik memang tidak sangka sambutan amat menggalakkan terutama daripada pengunjung luar yang pertama kali melihat ikan dan daging salai. Bermula kejayaan itu, pakcik teruskan perniagaan produksalai sehingga kini," katanya.

Menurutnya, dia memperuntukkan 100 kilo-

gram (kg) ikan keli salai, 20kg ikan talapia salai dan 60kg daging salai setiap hari untuk dipasarkan di pasar tani.

"Walaupun 100kg setiap hari, ia kadang-kala tidak mencukupi terutama ketika hendak menyambut Hari Raya Aidilfitri," katanya.

Difahamkan, selain berniaga di pasar tani di sini, Haji Taib juga bantu anaknya dalam perusahaan santan di pasar tani Tanjung Ipoh.

Dikumiakan empat cahaya mata bersama Noriah Mohd Nor, 75, kini Haji Taib ditemani tujuh orang cucu.